

TIME OUT

Talk Show Deportivo cu CLARET LOPEZ

AWE

17 AUG.

PA 6:30 PM

15  ATV

Stephanie, Frank y Rick Velasquez.

Frank 4 aña sigi MVP di St. Joseph University na USA.

Kende ta bin pa weganan di reino?

Nos ta gusta piki y come otro por nada

Mi a keda masha desapunta ultimo dos dia scuchando criticanan cu tabata tin riba Sparkling Tours 2005.

Ta mescos cu mi ta scucha criticanan na radio tur dia riba candidatonan politico, si nan ta capacita of no.

Nos ta gusta piki y despues critica otro y come otro por nada. Ki dia lo tin algo na Aruba di cual cada hogar ta disfruta di dje, manera Sparkling Tours 2005, y cu nos ta acepta boca cera?

Mi a keda masha satisfecho cu e trabao cu huradonan di e festival a cumpli cune, a pesar cu ainda mi ta buscando color di voz, pero cu no ta kita nada afo di e dificil cu e decision sigur tabata, apesar cu **ROBERTO** Zeeuw tabata e favorito grandi for di comienzo y 3-D (**Rebecca, Viona y Roosje**) por a ser considera como di 2 favorito.

Cu **Michel Almary** a logra di 3 lugar, tabata e unico sorpresa di e anochi, pasobra e di tres lugar cu ningun hende a spera, dependiendo solamente di **UN** ganador, tabata puesto cu cualquier di e otroan por a gana.

Esaki sinembargo a bay pa **Mitch** pa su bon presentacionnan e anochi aki, y con el a sobresali den su prome dos anochinan.. Apesar cu mi ta considera cu hurado a haci un bon trabao, ta e puntuacion na final so mi no a gusta **PA NADA**.

Si cada hurado tabata tin un participante pa opina ariba, locual a pasa despues cu Roberto a canta, no a cay na mi agrado, esta cu na lugar di un solo hurado, ta varios di e miembronan di hurado (**INDIRECTAMENTE**) a indica cu nan ponencia, cu no tabata tin pa gana Roberto.

Mi no a gusta criticanan cu mi a tende e dos ultimo dianan, pasobra e criticanan aki no ta yuda na drecha nada.

ROBERTO A MERECE E PREMIO GANA

Cu Roberto a canta na Ingles, cu e no a papia Papiamento, cu e no ta arubano etc. no tin nada di haber cu e Festival aki.

Mi a considera e comentarionan ey como un **DISCRIMINACION**, pa cual nos ta campeon aden na Aruba, aunke nos kier sconde esaki pero **NO POR**.

Un hende a puntrami si mi por bise "**kico tin scondi**" tras di e actividad aki, y e sponsor principal.

Mi a contesta cu mi no a mira **NADA** politico, tras di henter e show, si ta esey e kiermeen, y cu **Tele Aruba** a logra un **Homerun** (palabra di un hurado pa un participante) mi no a mira nada politico su tras.

Mester tene cuenta cu no ta un sponsor so tabata, pero otroan cu a hinca miles di florin den e actividad aki como patrosinador. Loke si mi a mira ta cu Tele Aruba tabata tin un gasto grandi cu

e transmisionnan aki, y henter e organizacion, cu tabata tin henter Aruba den su gara pa e trabao formidable cu e equipo nobo di Tele Aruba a haci pa e show aki.

Mi a tende critica riba e 35 mil dollar cu Roberto a gana.

Tampoco mi tabata di acuerdo cu un suma asina grandi ta bay pa principiantenan, pero kico mi sa di e combenionan cera entre organisadornan, cantantenan y nan mayornan?

NADA!!

Pues riba esaki mi no tin nada di reclama tampoco, si e placa ta bini di patrocinadornan cu mester sa kico nan ta haci cu nan placa. No ta mi placa.

Si kier a reclama riba e suma di premio, mester a reclama for di luna di juni cu a cuminsa duna promocion na e actividad y cu tur esaki tabata conoci, y no awor cu e Festival a termina.

Conociendo Roberto den Village, mi a keda sumamente contento cu Roberto a gana, y manera el a expresa, e ta yuda su mama cu e placa aki. Placa cu sigur lo ser usa di lo mas positivo posible.

Sparkling Tours 2005 tabata **FANTASTICO**, pa e participantenan, organizadornan, Setar NV como sponsor principal, Tele Aruba, e patrosinadornan di e show, e presentadornan, e publico, y pa henter e pueblo cu a disfruta di 3 show cu a kibra rating di transmision sigur, aunke asina leu cu mi sa, no tin un instancia cu por midi rating di sintonia di medionan di comunicacion, na cierto momentonan di dia, riba nos isla, pa por bisa cu cierto porcentahe ta sintonisando.

Mi a keda encanta cu e lazo di amistad cu tur e participantenan a cera cu tur esnan envolvi den e actividad aki y con tur tabata sostene otro y sinti pa otro na momento di descalificacion. Esaki ta un meta importante logra.

Mi critica?

E anochi a wordo gerek demasiado. Por a nota hasta cerca publico cu nan tabata cansa y tabata sperando e final pa por a bay cas.

Lo tin hende cu no sa, pero tin un lista grandi di hoben cu ya a registra cu deseo di participa den e siguiente Sparkling Tours.

Esakinan sigur, di awe caba te cu luna di mei 2006, lo ta ensayando siman tras di siman pa por ta participante oficial otro aña.

Mi conseho pa otro aña?

Si bo no ta bay mira e show personalmente y kier sigui esaki via television na cas, pone un BBQ -night na cas, y den grupo goza di e anochi aki.

Bo spare-ribs, steak, galiña, salada y su pan cune, ta baha mes bon cu e show.

Juby Naar.